

2. D. B. V.

DISPUTATIO INAUGURALIS MEDICA

DE

OPHTHALMIA,

*Quam,*Duce & Auspice Summo Archiatro,
Decreto atque AutoritateMAGNIFICI SENATUS ASCLEPIADEI
in Illustri Athenæo SALANO,

P R Æ S I D E

GEORGIO WOLFF.

GANGO WEDELIO,

Medic. Doctore, Archiatro & Theoretices

Professore Publico, Facultatis suæ h. t. Decano, nec non
S. R. I. Natur. Curios. Adjuncto,

P R O L I C E N T I A

Summos honores & Insignia Doctoralia in arte Medicâ
solenni ac legitimo modo acquirendi,*Publicæ Philiatorum censura offert*

M B R O S I U S R E H M E,

EISENBERGA OSTERLANDUS,

In Auditorio Majori,

*Ad diem**Octobr. horis ante & postmeridianis,*

A. O. R. M D C L X X X I V.

J E N Æ,

LITERIS KREBSIANIS.



I. N. J.

PROOEMIUM.



Ltâ turri collocatus vigil publicus non tantum ad hostem extraneum imminentem arcendum impendit curas, monendis ab ipso maturè civibus; sed maximè ne flamma vorax urbem consumat, quâ ex oriente ferali signo periculum denunciat.

Supremâ in speculâ corporis locati sunt oculi, sanctioris regiminis emissarii primi, ut, si quid mali immineat, caveri & dirigi motus in salutem totius possit.

Si ipsa turris vel fulgure quassa ardeat, vel aliunde insolitas experiatur flammæ, tota urbs stupet. Idem in excubiis microcosmi contingit.

Omnibus hæ prospiciunt membris, arcentque discrimina præsentia, mox monitis pedibus, manibus, aliisque apparitoribus, ne quid detrimenti capiat respublica.

Et ipsi tamen oculi suos patiuntur manes, seu cœlo contermino compatiantur, indeque grassantes experiantur ignes, seu inferiori loco flamma huc ascendat. Tristantur hoc incendio, nec fungi munere suo possunt amplius, quousque faces accenduntur dolorum, & in ambitum exporrigitur ignis.

Affluunt undæ uberes domesticæ, ast alunt potius ignem, quàm extinguunt. De rubore hoc flammeo oculo-

rum, qui ophthalmiæ nomine venit, dicere aggredimur, à summo numine divinam implorantes opem!

TRACTATIO.

§. I.

QUandoquidem de Ophthalmiæ naturâ & curatione disserturi sumus, operæ pretium fore existimamus, ut de ὀφθαλμολογία necessaria quædam præmittantur. ETYMOLOGIAM quod attinet, ὀφθαλμία vocabulum origine Græcum est, nec minus usu receptum, Latinum, ut plurima alia apud medicos, quandoquidem, à Græcis ad Latium progressa est ars medica. Dicitur ita à parte affectâ, ἀπὸ τοῦ ὀφθαλμοῦ, ab oculo, uti nō pauci quoq; alii morbi, teste *Galeno l. 2. M. M. c. 2.* qui hoc ipso pressius statim significant & innuunt vel solo nomine læsionem præternaturalem, & locum læsionis ipsum simul.

§. 2. Quamvis verò, vel ex ipsius vocis ophthalmiæ genio, per eandem omnes oculorum læsiones comprehendi posse videantur, uti hoc sensu *Hippocratem 3. aph. 11.* locutum quidam asserunt, quarum Græci verbosiores ultra sexaginta propriis nominibus designarunt, & *Cardanus de aquâ p. m. 1460.* supra quadraginta talismodi affectus dari scribit; Nihilominus usus dicendi magister, imò tyrannus sæpe, obtinuit, ut tantum de certo oculorum morbo dolorifico ac molesto accipiatur, ut si ophthalmiam dixeris, inflammationem intelligam & huic cognatos alios vel comitatos affectus, seu potius in latitudine suâ spectatam.

§. 3. SYNONYMA si spectemus, vocatur per periphrasin Græcis. Φλεγμονὴ ὀφθαλμοῦ. Latinis inflammatio oculorum. *Celso* audit lippitudo, ab adjuncto, quod in eo malo lachrymæ fervidæ ex oculis stillare solent. Hanc in rem notandum est, lippitudinem duplici sensu accipi posse, latiori, pro quâcunque illachrymatione, involuntariâ & morbosâ,

bosâ, seu cum inflammatione, seu sine eâdem, quorsum
& coalitus palpebrarum, infantibus non infrequens, re-
ferri potest; strictiori pro ophthalmiâ ipsâ. Sufficit vel una
hæc medicorum Ciceronis autoritas, ophthalmiam veram
nomine lippitudinis exprimentis; unde lippitudo modò
humidam ophthalmiam denotat, de quâ *Horatius l. i. sat. 5. v. 30*
canit:

*Hic oculis ego nigra meis collyria lippus
Illinere.* — — — — —

Quod etiam notus ille versiculus de eodem & Virgilio,
dyspnœâ forte laborante, exprimit:

Hic inter lacrymas sedet & suspiria Cæsar.

Modò de ficcâ Ophthalmiâ, vel pumiceis oculis, juxta
Plautinam phrasin, accipitur eadem. Adeoque non rarò oph-
thalmiam comitatur, vel spuriam constituit eandemque et-
iam aliquando præcedit. Vernaculâ nostrâ ophthalmia
audit die Entzündung der Augen / Augenweh / Augenbeschwe-
rung / rothe flüssige Augen.

§. 4. DEFINIRI potest affectus, quod sit inflam-
matio tunicæ adnatæ oculi, cum rubore, dolore, & illachry-
matione, à πύρρ sanguinis acrioris.

§. 5. GENUS est inflammatio, morbus commu-
nis, seu de singulis quasi classibus participans. Absolvit
enim eandem morbus intemperiei calidæ primariò, adest
verò secundariò & vitium conformationis, ratione tumoris
seu magnitudinis auctæ; ac denique dolor affligens solu-
tionis continui index est, & ita rectissimè à medicis inter
compositos refertur. Confirmat assertum *Galenus lib. de diff.*
morb. cap. 13. ὀφθαλμία, inquiens, φλεγμονὴ τῆς ἐπιπεφυκότῃς
ὀυλῆς ἐπὶ ἀρχῇ. Ophthalmia est inflammatio adnatæ tunicæ.
Sumitur autem nomen inflammationis latè pro quâcunque
intemperie cum rubore conjunctâ, reliqua adjuncta modum
& gradum dicunt, unde de verâ & exquisitâ ophthalmiâ,
A 3 quod

quod & de aliis morbis valet, καὶ ἐξ ὧν instituitur tractatio. Estque hæc ipsa pro cuiusvis partis modulo judicanda.

§. 6. SUBJECTUM PRIMARIUM, seu radicationis, est tunica adnata, conjunctiva aliàs dicta, album oculi, si sensum & usum terminorum attendamus. Levis hæc & tenuis à pericranio orta, omnium extima atque ossi proxima. Afficitur verò præcipuè quoad vasa arteriosa, venosa, & substantiam nerveam. Quamvis enim, si benè habeat, nulla talismodi vasa inesse videantur sanguifera, vel paucissima & rara solum vestigia; attamen vel morbus hic eadem satis superque patefacit. Hinc ut aliæ membranæ suos in hoc manes patiuntur, pleura, periostrium & aliæ: sic non minus hæc oculi communis membrana integens inflammationem subit.

§. 7. SUBJECTUM ADÆQUATUM seu pars affecta ratione denominationis est oculus totus, affabrè factum & admirandum visionis organum. Præter dictam enim adnatam tunicam, aliæ quoque non rarò partes, videlicet, palpebræ, muscoli & tunicæ reliquæ, nimirum uvea & cornea, imò humores in bulbo latitantes proprii, (in primis aqueus, hinc & crystallinus & vitreus) afficiuntur; sed hoc fit secundariò magis, unde non sine subjecto primariò affecto vel patiente dicto afficiuntur.

§. 8. CAUSA inflammationis oculorum PROXIMA est πνεύματις, proprius sanguini & sero conjunctis, αἰθερώς καὶ βιαίως, confertim & cum impetu magis fiens. Hinc cum plus affluat, quàm refluat sanguis, poros tunicæ, quibus allabitur, replet, ibique αἷον quandam nanciscitur, nec à venis recipitur, adeoque in circulo suo impeditur, unde & vasa prius occultata & abdita in conspectum prodeunt, color ex albedo in sanguineum vertitur, solutio continui fit & reliqua, tragœdia peragitur.

§. 9. Ut verò inflammationem absolvit πνεύμα συνιστάμενον, fluxio jam consistens; ita CAUSA MEDIATA PROXIMA OR est πνεύμα ὀρεώμενον, impetus humoris, quoad essentiam, alimen-

mentaris sanguinis ferofi, undecunque illam velut spinam acquirat. Facit huc ipsa *quantitas* saltim respectiva, cum sanguis in tunicam adnatam, palpebrisque succinctam, in nimiam copiâ exundat & recipitur, ut vasa distendantur, distensa quasi divellantur, unde tumor partium vicinarum, interdum simul exoritur. Pondus addit *qualitas* intensior, calida, biliosa à salibus inæqualibus oriunda, quâ falsedine, acrimoniâ & mordacitate teneræ, delicatæ & sensiles, illæ rotunduntur partes, sicque molestiam, dolorem, ruborem aliaque plura mala reportant. Quandoque, si in minoribus moleculis mali causa consistat, *vaporibus* id adscribunt autores, consimili caractere, ut ut remissiori, gaudentibus.

§. 10. Præcipuè verò ultimum & maximum momentum addit *motus*, seu circulus læsus sanguinis. Partes hæ ferosæ & exangues pro alimento magis sibi deponunt serum, tanquam conforme substantiæ suæ, quæ ratio etiam dari potest, cur pauciores venulæ, magis pro vitali calido, quam nutritiâ alimoniâ huc amendantur. Quandocunque verò vel sanguis ampliores affectat vias, proprio licet intempestivo motu, vel lymphæ acrior lancinans poros dilatat, & peregrinum hospitem invitat, inflammatio talis oboritur, utriusque vitio motu, quod phænomena testantur, lachrymæ enim sero, rubedo sanguini accepta ferenda. Adeoque qualitas infensa sanguinis non semper à priori adest, vel *intoto*, sæpe in sanissimis cæteroquin fiente ophthalmiâ, sed sæpe quoq; à posteriori, illapsu tali procurato, vel ipsâ partis debilitate nativâ vel adscititiâ velificante. Hæc ut ophthalmia est κατ' ἐξοχήν, humida magis & vera; sic quando serum minus unâ concurrat, & sulphure suo expanso sanguis præcipuè, etiam deficiente quasi sero, in poros hos ingruit, fit, ξηροφθαλμία dicta potius, sicca & spuria, sanguis enim ophthalmiæ causa, modò purus est, modò pituitosus, modò biliosus, unde diversi gradus inflammationis consurgunt.

§. 11. VIÆ, per quas sanguis adfluit, recipitur & hinc inde in partem affectam distribuitur, sunt arteriæ, ex legibus circu-

circulationis, remotius venæ & vasa lymphatica. Nec opus est, ut P A R T E M M A N D A N T E M specialem laudemus, sufficit ipsa *ὥσπερ*, *pulsio* universalis, & *ἐλξίς*, succedens infixæ huic spinæ. P A R S R E C I P I E N S est exquisitissimi sensus, non tam quoad vasa, quàm quoad poros minutissimos, quos illatus calor & dolor dilatant & archeum stimulant, sicque eandem læsionem maximè adjuvant.

§. 12. CAUSÆ MEDIATÆ REMOTIORIS titulum subeunt omnia illa, quæcunque vel humoribus vitalibus addere stimulum, vel ipsos oculos irritare & molestare possunt. Ex N A T U R A L I B U S id præstat T E M P E R A M E N T U M calidum & humidum, calidum & ficcum, tum totius, tum partium, fluxionibus & ardoribus obnoxium. Licet enim & corpora temperamentis aliis gaudentia in ophthalmiam, pariter incidere possint; attamen in illam sicca & calida magis inclinant.

§. 13. Æ T A S juvenilis quantum conferat, in aprico est, in hac enim calor innatus majorem acquirit acrimoniam & motum, aliique in victu errores facile committi solent, & ita præ reliquis ad productionem acrimæ & salforum humorum fit dispositio.

§. 14. S E X U S virilis frequentius hoc malo affligitur, ob calidiorem & biliosorem sanguinem; fœmininus verò respectivè rarius, ob humiditatem temperantem salia, & quod ad uterum magis fiat decubitus ac exitus sanguinis. Hoc verò beneficio naturæ cessante in senio frequenter videas vetulas hac laborantes, quarum rubedo ferè in proverbium abiit. HÆREDITARIA tandem D I S P O S I T I O, uti in plurimis aliis affectibus, ita & in hoc locum habet; è lippis enim lippi geniti subinde illud approbant.

§. 15. Ex N O N N A T U R A L I B U S plurimum confert A E R, quoad anni constitutiones & alias varians, præprimis æstivus, calidus; & ficcior, ad flavam bilem copiosè generandam idoneus, & ophthalmiæ ferax habitus, *aph. 16.* item inæqualis quoad tempora anni, unde si hyeme sicca prægressa & aquilonia,

aquiloniâ, ver pluviosum & australe fuerit, æstate ophthalmi-
as fieri necesse est, mulieribus præsertim & viris naturâ humi-
dioribus, 3. *apb. 11.* vel contrâ ea si hyemem australem, plu-
viosam & clementem, ver siccum & aquilonium excipiat 3.
apb. 12. Idem non minus valet quoad quotidianam constitu-
tionem. Aer frigidus aquilonius huc facit, quatenus suâ
constipatione obstruit poros, sicque calida effluvia retardat,
humoresque in oculis calidos reddit, imò ipse quoque τὰ ὀφθαλμοῦ
μὲν δάκρυα, mordet oculos, 3. *aphor. 17.*

Frigus ergo dum u-
rit & coagulat humores, torpidosque reddit, facile σάων ex-
citât, maximè, cum oculi injuriis aeris sint expositi præ aliis,
unde memoranda etiam πύματα ἀνέμους, venti irruen-
tes. An verò ab oculi quotidianâ lotione frigidâ institutâ
oriatur, quod *Hildanus* notat, dubitamus, latente sine dubio
aliâ causâ, cui id adscribi debuit. Callum enim quasi in per-
ferendo frigore contraxere oculi, ut nisi mordeat, & magis
improportionatus fuerit, non æquè noceat. Quin frigida
potius aqua affluxum lotioni impedit & defendit. Atq; hinc
non rarò etiam epidemiæ ophthalmiæ observantur, ob æris
talem constitutionem, frigidam & humidam, qualem me-
morat observatam *Amatus Lusitanus cent. 7. obs. 80.*

§ 16. In CIBO & POTU commissi errores mali produ-
ctionem adjuvant. Salina, acria, fermentativa & corrupti-
oni facilè obnoxia, omniaque aromata calidiora adhibita,
symbolum addunt. Speciatim insidiantur oculis ulus cepa-
rum, allii, raphani, seminis sinapi, cannabis, lactuca, fabæ,
lentes & alia vaporosa, vel nervoso generi inimica. Sale atque
fumo adornati ac indurati cibi uti scorbuticis malis variis, ita
& huic excludendo obstetricantur. Potus vini potentioris
& generosi, immodicè sumti, sanguinem accendit & serum
exacuit, unde ad oculos facilè amandari possunt fluxiones.
Hinc inter mala à vino oriunda etiam oculorum rubedo me-
moratur à sapientissimo Rege *Proverb. c. 23 v. 30.* Intendit id e-
tiam *Martialis* de Aulo, vini potore nobili, VI. 78. ita canens:

*Huic dicit Medicus, bibas caveto,
Vinum si biberis, nihil videbis.*

Tabaci fumus, in societate cerevisiæ immoderatè admissus, huc quoque reducendus, utpote, qui ad fluxionem oculorum foris atque intus fores aperit.

§. 17. MOTUS & QUIES, SOMNUS & VIGILIÆ modum debitum excedentia in avia præcipitant humores, illorumque stagnantium agitationem, & cruditatum novarum generationem accelerant. Sic omnis vehemens exercitatio oculos quoque damno suo mactat; sic saltationes in multam noctem protractæ; sic lucubrationes, ut quietis, sic & sanitatis velut fures nocturni, ophthalmiam pariunt sæpissimè.

§. 18. EXCRETA & RETENTA tam utilia, quam inutilia, si non legitimo modo aut tempore fiant, culpâ non vacant, præcipuè quæ per emunctoria sensuum, os, aures, nares, ipsosque oculos excerni debent, si intermittantur, humores stagnantes faciliè ad oculos redundant, ibidemque salia sua infigunt. In mulieribus mensium suppressio occasionem uberem hujus affectûs suppeditare potest. Si enim menses ipsos per oculos prorupisse verum est, testibus *Schenckio lib. 4. observ. 257. p. 257. Dodoneo, Observ. Medicinal. c. 15. p. 34. Lud. Mercato lib. 1. c. 7. de mulier. affect.* aliisque, cur non ibidem inflammationem causari queant? Exemplum talis Ophthalmiæ à mensibus retentis recenset *Gabelchoverus Cent. 3. cur. 61. p. 99.* Nec excretiones nimix immunes sunt, ob fermentationem conjunctam, quale quid de venere immodicâ quidam annotarunt, nec experientia deest.

§. 19. EX ANIMI PATHEMATIBUS memoranda, tristitia & conturbatio, unde & lymphæ plus justo salina fit, & lachrymarum profusio, utraque consequenter ophthalmiæ occasionem præbentia, vel eandem præsentem adaugentia. Hinc à lachrymis rubent ordinariè oculi, eliquatâ sic per glandulas lymphæ, accersitis salibus, liquatis & immerfis quasi è centro suo spiritibus animalibus, indeque tum noxæ plurimæ oculorum, tum ophthalmia scaturiunt.

§. 20. Huc referendæ sunt porro multæ RES aliæ EX-
TERNÆ

TERNÆ, v. g. solis flammantes radii, ignis, flamma & fulgur oculo accersunt malum, imò nix ipsa, & quodvis sensile, excellens, seu ὅσα λαμπρότερα καὶ αὐτὴν ὄψι, *quæ splendidiora sunt, quàm ipse est*, lædere apta sunt. Infamis hoc nomine, est & fumus, qui, quò acrior est, & propius ac crebrius oculos impetit, eo maiorem illis molestiam concitat. Sic artifices, quibus cum metallorum & mineralium fusione, probatione aut aliâ tractatione negotium est, tum ob dictam objecti luminosi eminentiam, tum ob conjunctum non rarò gas venenosum acre, inter alia mala etiam facillè auferunt inde ophthalmiam, qualem à suffitu cinnabaris & ὀφθ. ortam *Hildanus cent. 2. observ. 24. p. 102.* notat. Adde πᾶν, ὃ, τι αὐτὴν ἐμπέσῃ, *omne quod inciderit*, pulveres, præcipuè adurentes, casu quandoque, aut vindictâ ab iratis in oculos inspersi, uti de calce, (quale exemplum nuperrimè in murario vidimus,) cineribus, arenâ aliisque similibus notum est. Insuper etiam omnia mordacia & salina, nitrum, Plumbum, ærugo, alumen, ustum, & tatus, ac similia, quæ facultate rodendi oculū lædunt, fluxionem, præeunte calore vel dolore, movent, stimulant, calefaciunt & inflammant, ophthalmiam non modò oculo accersere, sed & præsentem deteriore reddere valent.

§. 21. Causas ejusmodi recensitas tam internas quàm externas brevibus non inconcinnè comprehendit *Schola Salernitana*:

*Balnea, vina, Venus, ventus, piper, allia, fumus,
Porrum cum cepis, faba, lens, fletusque, sinapi,
Sol, coitusq̃, ignis, labor, ictus, acumina, pulvis,
Illa nocent oculis, sed vigilare magis.*

Idem *Levin. Lemn. l. 4. de occult. naturæ miraculis c. 6.* ubi de oculorum læsione agit, confirmat: ventus, inquit, aeris constitutio, regio, morbi, affectus ac perturbationes animi, immoderata venus, inedia, somnus & vigilia immodica, crapula, oculorum cùm colores, tum spirituum atque humorum qualitates immutant.

§. 22. RES PRÆTER NATURAM variæ occurrunt, aliæ quidem remotius, aliæ proximius afficientes. Laudari potest hanc in rem intemperies viscerum, cerebri, hepatis, ventriculi, mala coctio & chylicatio; præcipuè verò febres. Sic in variolis & morbillis sæpissimè etiam oculi infestari solent, pueris cæteroquin & infantibus, ob humorum moderationem, rarius affligi hoc malo solitis, nisi gravior dispositio adfuerit. Accusandæ etiam veniunt variæ obstructions, vomitus nimius, ob faciei inflationem coarctivam, ut non repetamus violenta externa oculis illata, cum admodum impatientes sint tantum non omnis duri, asperi, acuti, vel qualitatibus sapidis aut acribus præditi. Affines verò affectus ophthalmiam faciliè sibi sociant, catarrhi, coryza, tussis, & dolores capitis. A dysenteria gravissimam, & oculis propemodum fatalem ophthalmiam observavit, D. Præses in viro primario. Observatur etiam subinde juncta ophthalmia lvi venereæ, teste præter experientiam Job. Stephani Decade 7. Conf. 5.

§. 23. Nec reticendum est contagium, quando quidem de subjecto ægro faciliè transit in sanum, partim ob consensum archei, qui tali aspectu tristatus fluxum consimilem faciliè patitur, uti illachrymari & commoveri oculos, in inflammatos alteros reflexos, sensu percipimus; partim ob effluvia acria, calida, quæ conversatione derivata in oculos sanos eosdem *μολοματι* suo afficiunt. Non audiendi itaque, qui contagiosam dari negant, ut videtur Plempius Ophthalmogr. l. 5. c. 2. p. 318. Contagiosa est tum per se, quod diximus, præsertim si longior fuerit & alia contagii requisita respondeant; tum per accidens juncta aliis malignis, ut feбри Hungaricæ, pesti & aliis. Innuit id Poëta ita canens:

Dum spectant oculi lesos, leduntur & ipsi,

Multaque corporibus transitione nocent.

Novit D. Præses uno infante ophthalmiâ longâ correpto alterum fratrem minorem natu per contagium tale eosdem passum manes, ut utrique conjunctim diu molestiâ tali afficerentur.

§. 24. Relictis causis progredimur ad DIFFERENTIAS & gradus Ophthalmiæ, cum in prognosi & curatione multum attendi mereantur. Sunt autem ratione GENERIS inflammationis hujus tres potissimum differentiæ, nominibus separatae, & partim loco, partim magnitudine distinctæ.

1. Τάραξις seu *conturbatio*, quæ principium inflammationis est, ubi oculus humidior reddi, rubere & dolere incipit, idque à foris adveniente causâ, adeoque ophthalmia notha seu levis dicitur, quia, remotâ ejus causâ, ferè removetur, item epiphora. 2. *Ophthalmia*, id est, vera inflammatio oculi; quæ fit, cum à copiosâ affluente materiâ calidiore membrana intumescit & dolore insigni tentatur, oculi incalescunt & illachrymantur, atque deinceps, cum ad concoctionem pervenit materia, in angulis oculorum fordes quædam albescentes & lentæ concrescunt, quibus interdû cilia ita agglutinantur, ut disjungi facîle nequeant, unde etiâ lippitudinis nomen hæc inflammatio accepit. Et hæc, juxta *Ebn sinam* l. 3. fen 3. tr. 1. c. 6. apostema simplex est in conjunctivâ, nō pertransiēs terminū exuberationis venarum, fluxus & doloris. Hæc media est, respectu *ταράξεως* gravioribus, respectu *χημώσεως* mitioribus symptomatibus stipata. 3. *χημώσις*, qui summus ophthalmiæ gradus dicitur, quando ita increvit inflammatio, ut etiam corneam tunicam occupet, symptomatibus ophthalmiæ veræ ita intensus, ut utraque palpebra inflammata simul intumescat & velut invertatur, nigro oculi depresso, ut veluti hiatus in oculo appareat, & visus ferè prorsus auferatur.

§. 25. Ratione SUBJECTI quandoque alteruter, quandoque verò ambo oculi, ob consensum viciniæ & officii, patiuntur. Sic interdum sola tunica adnata, interdum etiam viciniæ oculi partes aliæ, ob magnam inflammationem in consensum trahuntur. Alia *πρωτοπαθική* est, alia *δευτεροπαθική*. Ratione CAUSARUM totuplices esse possunt species ophthalmiæ, quotuplices ejus causæ sunt in præcedentibus enumeratæ; alia quippe à sanguine puro, alia ab humore bilioso, pituitoso, seroso, melancholico, falso. Alia à causis in-

ternis, ab externis alia; alia contagiosa, alia minus; alia epidemia, alia sporadica.

§. 26. Quædam à motu est periodica, quæ periodos habet & intervalla, nec diu durat, sed modò intermittit, modò redit, sicque per intervalla tunicam adnatam affligit, teste Galen. l. 2. de diff. febr. cap. 11. Tempore etiam differt ophthalmia, alia in initio, augmento, statu, declinatione.

§. 27. SIGNA DIAGNOSTICA pensitanda veniunt respectu GENERIS, seu ipsius inflammationis. Latere hæc nescit, sensibus obvia. In ESSENTIALITER INHÆRENTIBUS venæ distenduntur & conspicuæ evadunt, oculus rubore, ardore & dolore afficitur, lachrymæ plus minus, pro causarum conditione & vehementiâ, ab humore tenui exstillant. Tumor æstimandus ex climatis ipsius & bulbi modulo, magis intensivus hoc loco, quàm extensivus. Nec suppurandi deest potentia, quæ singula de essentiâ sunt inflammationis. In ESSENTIALITER CONSEQUENTIBUS adest imminuta videndi actio, oculo connivente & lucem refugiente. Fungi enim officio suo dolens, tumidus ac lachrymis afflictus nequit, nec palpebræ diduci sine molestiâ semper. Palpebrarum quoque fit coalitus tempore matutino, qui debetur concretioni humorum noctu affluentium, sed minus effluentium ex illis ita ac interdium. Quin pupilla subinde angustatur & unguiculo obducitur, crispatis fibrillis. Sæpe etiam depravatur visus, objectis omnibus rubris apparentibus & flammeis. Conjunguntur sæpe dolores capitis, febris ipsa faces dolorum accensos majores sequitur, & suppuratio, nisi caveatur, succedit. Tacemus vigilias & alia.

§. 28. Ratione SUBJECTI, an solum adnata tunica, an bulbus oculi totius, ejusque muscoli, an unâ palpebræ sint inflammata, colligitur ex gradu inflammationis. An per essentiam vel consensum, ex aliorum signorum communium & propriorum præsentia & absentia patet. Illud colligitur v.g. si dolor capitis & gravitas præcedit, vel conjungitur; hoc, si v.g. vomitus, nausea, aliave conjungatur, unde ventriculum
vel

vel alia coaffecta deprehendimus. Respectu CAUSÆ, humorum affluxus & præsentia ex recensitis apparet. Onerositas sanguinis *plethorica*, saltem quoad faciem, claret, si facies rubeat, tumor evidentior sit, venarum amplitudo cum calore conjuncta, nec humor destillans sit adeò mordax, nec dolor adeò vehemens. Sin à *biliosa* causâ oriatur, adest rubor faciei minor, lachrymæ tenues & acutæ, quandoque exulcerantes, & per somnum non adeò coagulatae, tumorque parvus visitur; interim punctura vel dolor acutus vehemens vel adurens magis præstò est, ita ut oculi quasi uri videantur. Et hæc communia ferè, *feri* verò abundantia affluxum majorem, biliosus status ob siccitatem *ξηροφθαλμία* magis prodit. Ab humore *pituoso* rubedo, calor & dolor non ita molestant, & lachrymæ non adeò sunt mordaces; sed omnia remissiora sunt, nisi à pituitâ falsâ sit malum, ac cohaesiones palpebrarum per somnum fiunt magis, ut minus possint aperiri, mucò quasi obducti, oculi. Si ab humore *melancholico* ophthalmia sit, noctu palpebræ non adeò conglutinantur, lachrymæ sunt paucae, tumor parvus & durior, color ad nigredinem tendit, morbusque diuturnus & valdè contumax. Causæ externæ & epidemiæ aliæque è suis fontibus noscuntur. Maximè verò notabilis est ophthalmia ferina, benignæ contradistinguenda. Talis dici potest tum omnis vehementior & oculi exterminium intentans, tum feri rosionibus in toto capite, oculis, facie emicantibus, qualem à *Præside* nostro visam meminimus.

§. 29. Signa PROGNOSTICA ad eundem ductum, respectu proportionis morbi & naturæ, lustrari possunt. Quoad SALUTEM & MORTEM i. ratione GENERIS, nullum vitæ periculum per se imminet, vel emanat ab ophthalmiâ, cum nulla pars principalis affecta, & adhuc est *ἐλάττω*, cum primis ubi medicamenta appropriata subsidiaque convenientia vocantur in auxilium, & iusta servatur diæta. Verùm si incrementum sumserit morbus & sit *ἐξέτι*, vel inveteratus magnisque symptomatibus stipatus, gravius damnum

num inferre potest, & periculosior meritò habetur. 2. Ratione SUBJECTI ophthalmia difficilior in puerili, quàm in aliis ætatibus, cæteris tamen paribus, curatur, neque enim facile se curæ & regimini medico commodè subjiciunt pueri: in super illi caput imbecille & humoribus magis abundans habent, sicut & senes. Melius sperare possumus, si circa pubertatis vel mensium instantem terminum observatur præsens affectus, argumento 3. *apb. 28.* Prout oculi plures partes vicinæ, palpebræ, muscoli, tunica cornea &c. læsæ & humor peccans intimius fixus, eatenus gravior est affectus. Membrana sola affecta minus malum portendit. Per consensum capitis autem ophthalmia ferè sæviora habet symptomata, quia quò pars nobilior affecta, eò graviora ejusmodi symptomata curatuque difficiliora emergunt. 3. Ratione CAUSARUM, quò benignior & mitior est humor, eò melius sperandum & contra. Humor sanguineus est mitissimus & benè sperare ægrum jubet; ferinus omnis pessimus, biliosus, serosus, scorbuticus. Hic si diu perseveret, pupillæ tabem & *putridæ* arguit, aut oculi visusq; corruptionem ac destructionem, verbo cæcitatem sæpe portendit, inprimis si oculos simul extuberet.

§. 30. Quoad LONGITUDINEM & BREVITATEM, durationis tempus variat respectu causarum, temporis anni, diætæ & aliorum accidentium. Inveterata & radicata longius requirit tempus, præ incipiente; dolor urgens ac perseverans pessimum signum, quod humoris acridinem, fibrillarum rosionem & continuatum affluxum notat. Si evacuationes spontaneæ subsequantur, spes maturæ ac securæ liberationis affulget. Notari hoc loco meretur, ophthalmiam in acutam & chronicam commodè dividi posse, illam vocando, quæ ad instar aliorum acutorum in suo genere & affligit gravius, & cum periculo majori, insignitamen cum latitudine, adeoque brevius terminatur. Hanc quæ lentè progreditur, molesta magis quàm periculosa est, habituata quasi. Tempora etiam ipsa, an in initio, an augmento, statu vel declinatione sit, variatio symptomatum & graduum morbi intensio vel remissio patefacit.

§. 31. **MODUM EVENTUS** ophthalmia fortitur non unum. Si enim æstimetur ad inflammationum rationem, vel dispalescit sensim sensimque, receptis suis in alveos sanguine & sero, nec exulcerantibus amplius, quod salutare est, & omni modo procurandum; vel tendit ad suppurationem, quod oculo funestum. Rarius tamen id contingit, nisi feri mali mos & dispositio corporis cacochymica læsionem gravius foveat, ideò, quia oculus naturâ suâ frigidior est, porique angustiores, ut tantus abscessus respectu aliarum parti im fieri non queat. Suppuratio verò levior, superficialiaria, in palpebris & partibus extra bulbum consistens, non adeò timenda. Lachrymarum profusio vel affluxus copiosus & continuus non adeò bonus; quamvis enim depleri videatur humor peccans, non tamen per locum affectum commodè id fit, si gravius impetat & longius, continui affluxûs indicio. Quod si autem ad alias nobiliores transfertur partes materia, per *ὡς ἂν*, v. g. cerebrum, cor vel nucham, ubique res periculi plena evadit, ob symptomata graviora hinc exoriunda. Periculum etiam minatur, si nova accedat fluxio, quæ cœcitatatis vel suffusionis metum prænunciat. Si lippientibus caput assidue longoque tempore dolet, si malum latius serpit & in malum morem abit, præsertim latente fomite in massâ sanguineâ, vix boni quid sperare possumus.

§. 32. Imperfectè etiam solvitur, si post se relinquat, unguiculum, nebulam, ulcusculum in corneâ, angustiam, pupillæ, vel obscurationem, imò & nonnunquam fistulam, lachrymalem. Per accidens verò contingit nonnunquam, ut nonnulli post desinentem lippitudinem acutius videant, quàm antea, discussis turbantibus humoribus & consumptis. Frequentius contrarium videas, si gravius fuerit malum, æstimandis omnibus hisce ad statum naturalem, quantum ab eo distent ac recedant.

§. 33. **CURATIO** duobus absolvitur, indicationibus & materiâ præsidiorum. **INDICATIO CURATORIA**
C morbum

morbum seu inflammationem oculi auferre jubet. **PRÆSERVATORIA** sollicita est de causarum remotione, ut causa morbifica, si quantitate peccat, diminuatur; si qualitate, alteretur; si motu & fluxu, revellatur, derivetur, resolvatur, & discutiatur. **VITALIS** tonum oculi & totius attendit, ut symptomata urgentia mitigentur, & commodâ victûs ratione & medicamentis corroborantibus archeo subveniatur. Fini autem huic ex voto obtinendo inserviunt **PRÆSIDIORUM MATERIE**, ex triplici usitato fonte, nempe chirurgico, pharmaceutico & diætetico depromendæ.

§. 34. **Primarium FONTIS CHIRURGICI** remedium est **VENÆ SECTIO**, in subsidium vocanda, si mali gravitas proportionatum hoc & conveniens præsidium urgeat. Uti enim in leviori casu eâ non opus est, ita in graviore, vel ex sanguinis undis foto, remedium est saluberrimum. Si plethora onerosa totum obsideat, deplenda est; si caput, idem innuitur. Major intemperies & sic alteratur, & præsertim, ubi sanguinis affluxus persentitur major, revulsionem præstat Venæsectio, quæ motum hunc concitatiores aliquo modo compescit, & ne ad partes has tanto impetu ruat, impedit. Prodest ergo his casibus Venæsectio, sæpeque gravissimi oculorum dolores intra horæ spatium eâdem sublatisunt, qualia exempla apud *Galenum* & alios occurrunt, ab inflammatione oculorum & imminente cœcitate liberatis ægris per sanguinis missionem. An administranda sit, elucet inter alia ex dolore, qui gradum majorem innuit, unde hunc ferè *Cous* nominat, quando venæsectionem commendat 6. *aph.* 31. & 7. *aph.* 46. quibus consentiunt & reliqui medicinæ proceres. Multò magis id opus est, si uterque oculus simul laboret.

§. 35. Præsentem ergo indicationem, sanguinem emittendum esse, sicitò & tutò curationis opus perficere velimus, non cunctandum, sed initium morbi eligendum est, pro re natâ prius alvo evacuata. Speciale tempus quoad diem & horam præsentem directione absolvitur. Quod locum attinet,

cum

cum dextra dextris magis consentiant, ad revulsione & derivationis leges eligenda vena fuerit, modò major, ut in brachio, modò minor, ut in cephalicâ manûs, vel salvatellâ, pro ut depletionis necessitas variat. Præsentialior revulsio fit in pedibus, longius sic retrahendo sanguine. Nec inconsultò secantur minori gradu ardoris venæ sublinguales, raninæ dictæ, revulsionem particularem & definitam magis pro capite præstantes, ubivis moderandâ quantitate pro virium & indicantis modulo.

§. 36 Imò cum fervidioris sanguinis appulsus feratur per arterias, ad eundem arcendum & temperandum ipsa, **SECTIO ARTERIARUM** minorum in temporibus quandoque in auxilium vocanda, si malum v.g. revertatur sæpius, conjunctum sit cum dolore capitis, eoque pulsatorio, reliqua non juvent, viresque, ætas & artificis peritia consentiant.

§. 37. **Nec CUCURBITULÆ SCARIFICATE**, dorso affixæ, erunt de nihilo, præprimis si sanguinis copia non sit tanta, si æger adfuetus, habitus corporis consentiat, vel ipsa hæc evacuatio fuerit intermissa. Ita enim vicariam venæsectionis operam præstant, & per se insignissimè revelunt ad partes educationi huic majori cum *ἡ φοβία* aptiores. Institui potest scarificatio in dorso, brachiis, aliisque partibus carnosioribus, imò & pone aures, quod ibidem decurrant, vasa propinquius. Discussioni inserviunt etiam **CUCURBITULÆ SICCÆ**, dorso & brachiis applicatæ.

§. 38. **VESICATORIA**, cum seroso acri ichori deplendo unicè inserviant, summum ophthalmiæ sunt remedium. Si enim ex cantharidibus formâ emplastri vel cataplasmatidis parata cervici, vel humeris quoque simul, applicentur, locum ostendunt naturæ convenientiorem, quò extrudere hostica salia, sub lymphæ vehiculo hospitata possit. Valent hæc itidem in ophthalmiâ recenti & inveteratâ, cum affluxu, rubedine majori, & aliis urgentibus.

§. 39. Utque varianda sunt instrumenta pro materiæ tractandæ diversitate; sic & hoc loco, si brevi tractu depletio

feri onerosi acrioris fieri nequeat, natura ad oculos affectet, solennem quasi motum, & e massâ sanguineâ scaturiat hic impetus feri, ut duret longius vel repetat, aliaque mala graviora minetur, FONTICULI suadendi sunt, successivâ humoris evacuatione & revulsione continuatâ nobilissimi, in brachio vel pede inusti. Imò & in occipitio, ad revellendos humores ab oculis, instituuntur.

§. 40. SETACEUM, quâ operatione cervix acu compungitur, vulnusque apertum servatur, ut per id humores vitiosi evacuentur, multum auxilii in specie in affectibus oculorum promittit. Vehementissimas enim influxiones humorum, ne acervatim irruant, impedit, potenterque revellit. Hinc in affectibus oculorum gravioribus optimè laudandum est, ut duro nodo durum cuneum, gravi morbo heroicum sed tutum opponamus remedium. Locum habet, in adultis & ipsis infantibus aliquando, reliquis non juvantibus, urgente tamen periculo, & diuturnitate, & molestiâ, ut libertatem nobilissimo membro sceneremur. Plenæ hinc sunt laudibus meritis autorum observationes, adeo ut in ophthalmiâ inveteratâ & lippitudine non dari generosiores, medelam, nullum præstantius remedium, statuatur in scholis medicis.

§. 41. Ita enim & vesicatorii & fonticuli superat vires setaceum, quatenus stricturâ continuatâ gemino ulcere magis sufficiens & præsentanea fit depletio, subjungendo hinc fonticulo in brachio, ubi per aliquot menses cum successu hoc divinum ^{in aqua} celebratum fuerit. Neque audiendi sunt, qui vel ob timiditatem intempestivam, vel nescio quas leviores rationes contrarium sustinent. Si non juverit aliquando setaceum, non id remediî defectui, sed morbi gravitati & humorum copiæ adscribendum fuerit.

§. 42. FRICTIONES, quatenus revellendi humores fluentes potentiam cum reliquis præfidiis communem habent, conveniunt. Absolvuntur manibus vel linteolis asperis, sicciore ferè ut plurimum, tantisper continuandæ, dum

dum abunde incalescat & mollius reddatur corpus, jucundusque rubor effloruerit. Eodem spectant etiam capitis pectinatio & frictio specialis, ventriculo jejuno blandè instituenda. Nimia enim frictio non minus ac motus corporis nocere potest.

§. 43. Præter hæc universalia præsidia chirurgica aliquando & specialia necessaria sunt, ut si quid illapsum oculo aquâ elui minus queat, si pili palpebrarum ad oculum defleant, eumque pungant, refecandi & extirpandi; si lachrymæ & lachrymæ molestæ, detergendæ, quod providâ curâ omne præstatur.

§. 44. EX PHARMACEUTICO fonte curationi interviunt humori peccanti debita evacuantia, & tum humori, tum parti affectæ alterantia. Saburram è primis viis expediunt LENIENTIA *ἐννοπρωτικά*, quæ & reliquis medicamentis apparant aditum, & fermentum intestinorum exuperans, bilem, & pituitam blandè detergunt, præservandi fine commodissima ac curandi. Ex his nominamus *pulpa cassie, tamarindorum, sennam, mannam* in jusculo solutam, *elect. lenitiv.* & in primis *MP aloeticarum, ex aloe rosat. violat. MP Fe-arum Alium*, ut & *pil. de succin. Craton. eff. rhabarb. & senn. ðiat.* Eodem usu & clysteres vel suppositoria conducunt.

§. 45. Dum PRÆPARANTIA ante purgantia commendamus, divisas operas alterantium & purgantium esse, debere innuimus, non aliter ac in republicâ emendatio tentanda, ut mores mutantur, quâ non obtentâ in exilium mittuntur incorrigibiles. Nec aliud intendunt digestiva universalis & specialia, eadem cum alterantibus.

§. 46. Eminentius verò serofos & biliosos humores è glandulis intestinalibus & consecutive è massâ sanguineâ eliminant PURGANTIA. Quod revellentia sunt laudata, quoad circumferentiam & ambitum humorum, id purgantia in centro quasi & radice. Dum enim cacochymiam auferunt, defecant reliquos succos, ut blandè decurrant, nec exundent hic illi, vel exorbitent. Vifa est non rarò ophthal-

thalmia solâ purgatione curata, quæ via commodissima est & maximè naturæ conveniens. Prodesse hoc sine possunt medicamina ex *rhubarbaro*, *gialapâ*, *scammonio* aliisque parata, v. g. *pulv. laxativus vegetabilis*, *resin. gialapæ*, *scammonii*, *extract. belleb. nigr. panchymag. cathol.* varias in formas didenda.

§. 47. VOMITORIA verò omninò dissuademus, cum à violentâ & coactivâ illâ motione humorum ~~sunt~~ jam præfens in facie promoveatur magis, adeoque hoc impulsu valido sanguis magis magisque in oculos propellatur.

§. 48. DIAPHORETICA ut omnium inflammationum remedia sunt genuina, ita quoque in hoc affectu apprimè juvant, quo nimirum affluxus & copia materiæ imminuatur, & humores redeant in ordinem legitimumque statum. Laudari hinc poterunt *ebur* & *CC. s. Δ*, *unicornu verum* & *fossile*, *lap. bez. oc. S*, *giata*, *cinnabarina* & *alia* ritè præparata. *§ diaph. bez. Ale, Dre, cinnab. §* & *nativa* *~ta, M. S. Ra bez.* facile cum ophthalmicis & aliis miscenda, ut *▽ card. ben. scordii, sambuci, prophylact. rob. ebulli* & aliis. Idem verò longè magis valet, si lues venerea, dysenteria, febris & similia morbum foveant.

§. 49. Nec spem penitus defraudabunt DIURETICA mitiora, quæ serum fundunt, & ad renes atque vesicam ex toto corpore educunt, qualia ex *Mo*, *succino*, *lap. S*, *arcano* *Tri*, *clyffo* *§ii*, *Râ rosar. viol. papav. rhæad.* *~ Mo d. arcan. duplic.* & aliis mutuari licet.

§. 50. Ex evacuantibus particularibus laudem merentur MASTICATORIA, quæ destinata sunt superfluo sero evacuando, in salivalibus ductibus contento, ut isthinc quadantenus avocetur & ab oculis ad palatum derivetur, ne partibus nobilioribus inferat molestiam, paranda ex *cubebis*, *terrâ Japonicâ*, &c. Memorandus inter *δυσφλεγματισμός* hæc imprimis quoque est *tabacus*, cujus suffitus in serosis concedi potest.

§. 51. ERRHINA materiam pituitosam & lymphaticam etiam suo loco educunt, & sanguinem depurandi vim.

eâ ratione habent. Sint autem illa mitiora, ne propter tunicas naribus conterminas nervi optici in consensum trahantur. Hinc STERNUTATORIIS consultius abstinemus, ne concutiendo ad lachrymandum inducamus oculos, & spiritus æquè ac humores confundamus.

§. 52. ALTERANTIA & CONFORTANTIA interna hætenus præmissis colophonem addunt, quæ necessaria sunt tum roborando viscerum tonum, tum præcavendo, ne subrepat facile suffusio, aut visus ipse in deteriorem statum ruat. Faciunt ergo huc partim communia alterantia, & refrigerantia hepatica, partim cephalica & ophthalmica, v. g. ex *M.S. antiscorb. Râ ꝑ c. arc. ꝑ ri, elix. propr. Ali, Râ fl. bel. lid. compos. essent. lign. R coral. c. lign. ess. fumar. s & compos., Si, spec. diamarg. fr. diarhod. diatr. sandal. specificum cephalicum, succinata, perla & mater perl. nepeta, valeriana, euphras. indeque parata infusa, tragemata, electuaria, mixturæ &c.*

§. 53. Præter interna etiam EXTERNA, topica dicta, necessaria sunt, tum partibus vicinis, oculorum externo tegmini, fronti, nuchæ, temporibus, tum ipsi affecto oculo applicanda, & varianda non tantum respectu inflammationis ipsius, ejusque temporum, sed & comitatorum aliorum. Præstant reliquis polychresta, pluribus scopis satisfaciencia, primariâ intentione repellendi, discutiendi & demulcendi ante oculos habitâ. Reliqua secundaria sunt magis.

§. 54. Non promiscuè tamen & sine cautelâ in usum vocanda hæc Topica. Non v. g. nisi præmissis universalibus, vel saltem non neglectis; non ultrâ *εὐφροσύνην* & intempestivè. Valet enim & de his sæpe: nō patitur lusum oculus, & sæpe religiosâ nimis medicamentorum copiâ lædi eundem comperum est. Non nimis acria, vel lenta, quorum illa tristi induto sensu magis irritant, hæc verò obviscant. Non æquè semper frigida, sed tepida quoque, blandis enim & mucilaginosi, adde verò & acriusculis, delectantur oculi. Urgente dolore magis demulcendum, urgente inflammatione, magis temperandum, ubi vis tono non neglecto.

§. 55. REPELLENTIA affluxum arcent, refrenato calore, poris defensis, alterato fervido & rarefacto humore, ex frigidis aqueis, & mucilaginosi concinnanda. Acida enim refugit oculus & alias, & hoc potissimum casu. Sic ex alumine cum albumine ovi & ∇ rosarum conquassatis facile epithema ophthalmicum paratur non infimi usûs. Tales etiam sunt aquæ pleræque ophthalmicæ, quæ ratione frigoris & humoris sui repellunt, ratione salium subtilium digerunt; item mucilago *sem. cydon. psyll.* caro vituli recens macerati, fungus sambuci cum ∇ vis ophthalmicis mollefactus, catapl. ex pomis dulcibus, quæ ipsa ad temperandos humores etiam nuchæ solent applicari nonnunquam. DISCUTIENTIA *scilicet* prohibent, & coituros p. n. ex ordine dimovent, uti sunt acriuscula. DEMULCENTIA partem roborant & acrimoniam temperant ac obtundunt, qualia sunt mucilaginosi, & inter hæc lac ipsum recens emulctum blandè detergit & demulcet suaviter, magis tamen exterius, pro palpebris, quàm interius, instillandum.

§. 56. Ad horum modulum judicanda & feligenda, quæ in collyria aptantur, ex aquis *calcatrippæ, cyani, euphrasie, chelid. maj. rosar.* & simil. ex *perlis* preparat. $\frac{1}{2}$ *diaph. croc. metall. vitr.* $\frac{1}{2}$, *fl. cinci*, \odot *alb. lap. calam. tut. Alex. sarcocoll. mag. & sacch. h. sief. alb. c.* & *sine opio, unguent. nihil. pinguedo viperina* ipsa suis casibus, ubi discutiendi fuerit intentio & resolvendi, habito utrobivis selectu, v. g. in unguiculis & alias. Opia ta verò acrimoniâ suâ exterius magis irritant dolorem hunc, quàm juvant; nisi internè quis malit, vel parcius saltem externè remiscere.

§. 57. Restat DIÆTÆ regimen probè observandum. Hinc in VITALI AER eligatur temperatus & purus, fumi, pulveris & ventorum austrinorum expers, qui humores movendo, oculos lachrymis aliisque subsequen-
tibus malis suffundunt. Obscurior etiam paulò & tenebrosior locus eligendus est, in quo curationi se submit-
tant ægri, lucifugos enim eâ conditione eos existere mini-
mè

mè turpe ipsis est. Non malè quoque solent oculi pannis viridibus leniter obtegi, qui color inter flavum & cœruleum medius est, & cum hocce oculis gratissimus, quia blandè lucem moderatur; rubrorum autem, rutilantium aut fulgentium intuitus studiosè fugiendus est, quia lucem intendunt & improporcionatam reddunt debilibus jamdum oculis, unde & luminosa omnia intensius removenda sunt.

§. 58. In NATURALI CIBUS sit laudabilis, boni succi, facilisque digestionis; temperatus quoque & in justâ quantitate assumatur. Insuper non ingeratur novus modò ingesto vel assumto. Vitentur è contrario acria, dulcia, falsa, aromata, quæ bilem augent, aut humorum acrimoniam malumq; promovent; item quæ flatus vaporesque generant & excrementitios humores producant, ut cepæ, lac, olera, & quæ cum aceto parantur, quorum nonnulla in præcedentibus attigimus. Exprimit conjunctim hæc noxia & vitanda Poeta:

*Hæc oculis multum, sol, pulvis, fumus & æstus,
Ventus cum fletu, vina venusque nocent.
Acria ne mandes, nec quæ sint plena vaporum,
Nec cepas, lentes, allia, porra, fabas.*

§. 59. POTUS sit cerevisia defecata, nec nimis lupulata, aut propter lolium spiritibus & oculis infesta, nec nimis recens. Confortandi & alterandi fine etiam medicata varia facilè parari potest pro ordinario potu. Vinum, conjunctâ cruditate, exuperante pituitâ & spiritibus debilibus, moderatâ quantitate concedi potest; contrario statu minus. Ebrietas omnis caveatur; inde enim ad caput, articulos & oculos potiora damna resultant.

§. 60. In DIÆTA ANIMALI SOMNUS & QUIES pro oculis afflictis optima sunt præsidia. Ita enim oculus non movetur, nec exercetur, nec lumen adeò admittitur, aut humores ad illum affluunt, dolor itidem mitigatur.

tur. Vigiliis è contrario & lucubrationibus spiritus irrequie-
ti minus componi amant, sed exacerbari potius solent.
Æger non dormiat in latere, cuius oculus afficitur, cubetque
elevato magis capite. Motus post pastum non minus ac-
lectio & scriptio cavenda sunt. Exercitia quoque alia, qui-
bus intenti debent esse oculi, fugiantur.

§. 61. EXCRETA & RETENTA suum habeant con-
suetum modum; fervetur itaque alvus quotidie muneris sui
memor, si non naturâ, arte tamen sollicitata. Eadem ra-
tio est mensium & hæmorrhoidum, sudoris & similium
excretionum. ANIMUS liber conservetur à motibus im-
petuosis. Pacatus sit potius, nec irâ excandescat,
nec mœrore aut tristitiâ consuma-
tur.

SOLI DEO GLORIA!



Qui possis nævos oculis de-
pellere, monstras;
Inde labore Tuo præ-
mia digna cape.
Bina caput cingent ferta: unum
sponsus habebis,
Alterum & ipse dabit noster
Apollo Tibi.

Clarissimo Dn. Doctorando hæc gratulab. adpon.

Rudolf. Wilhelmus Krauß / D.

P.P.h.t. Acad. Rector.



*Il prodest oculis, vulgata
paraemia fertur;
ast nihil hoc oculis utile
non nihil est.*

*Tu præbes oculis nihil & medicami-
na vera;*

*non nihil, ast multum proderit
hicce labor.*

*Jam præstò est insignis honor, jam
purpura clara,
quæ Veneri contrà Phæbus opi-
ma parat.*

Amico & gratulante animo scribeb.

PRÆSES.



*Uæ variis vitiis oculorum
cura medendi*


*Sit, docto scripto, Fautor
amande, doces.*

Hinc

Hinc capias fructum doctrinae,
dextera Jovæ
Lætities fundat deliciasque
TIBI!

Hisce αὐτοχρῆδως
Nobilissimo DN. Doctorando, Fautori & amico
singulariter colendo, de novis honori-
bus gratulatur

M. Gottfried Pfeiffer.

 Uilibet in medio certanti palma reposita;
Sed bene currenti donatur palma reposita.
Haec tenus in stadio Medicorum quærere
palmam

Magna fuit Tibimet, *Frater dulcissime*, cura.
Sic docet hocce Tuum ingenii, quod prodis, acu-
men,

Atque palam magnâ Cathedrâ cum laude tueris.
Sunt oculi testes, quorum de ponte labores
Dejicis. En oculos ægrotus honestet utrosque.
Artibus hinc meritò partos Tibi grator honores,
Ut terræ patriæ decori sis jugiter, optans.

Sic gratulaturus fratris sui honoribus
accinebat

Johannes Heinrichus Rehme,
LL. Studiosus.